

尊
水
園
集
畧

尊水園集畧卷之

德州盧世澹德水著

受教李

源星來輯

趙其星仲啓

尺牘

上許繩齋先生

上范質公先生

奉候矣老師

荅李年姪

荅錢公調

荅范父母

荅胡嗣玄

與張子襄

與程畸人

與任文水

與程魯齋

四首

與沈無謀

六首

與孟幼輿

四首

與程正夫 七首

答許純齋先生

與鄭淡石

與韓廣文

答畢同年

與侄裕 二首又三首附後

與陳雪灘

與童將軍

與平湖令程疇人

與葉橫水令

荅賀勞山

自水園集畧卷之十二

尺牘

上許繩齋先生

各歲曾奏燕書數行經年始達函丈復辱先生不
棄而報以誨札開闔數四瞻之在扇載捧家言社
約文畧葛表伯集玉稿序九四種焚香莊誦百慮
冰息益養德維風檢身反古之方具是矣昏睛爽
曙非曰能之願學焉肅此百拜以謝伏念先生筆
出山龍言同闕石平生著作定已編摩成帙不揣

萬陋求備一觀倘由此盡見先生富美如饑十日
而享大牢寧第為篋笥之光已哉鈔完即還名山
斷不敢過佚也左傳有經先生批本亦借一鈔所
欲就正先生者無窮以削牘尊者稱引不可太繁
投筆亡宣精誠遙集嶽枳拘泥殊愧古人千里負
笈之篤未審何時一拜約履可勝鬱陶

上范質公先生

天下有不可不讀之書即有不可不見之人是以
讀其書想見其人未即見其人轉而尋味其書蓋

賤子誦法台臺制義及歌詩古文辭已十五年於此矣特以地勢懸絕未敢坐進書尺已思黃文節有言情異則連屋不相往來心親則千里晤對又言古之賢者有以國士期人畧去勢位許通草書某不敏因敢竊比於我老黃而通書於下執事伏念台臺品望業隆斗山一世使某再有引頌是譽克也又以官卑且不肖在先達前稱說不宜過煩用是約畧生平十五年來一片執鞭晏子之悃不避未同聊箋姓字雖然亦有謝焉某客歲於役秣

陵繆辱太翁老先生下交之雅破格相愛至今仍
坐春風又以大刻數種見餉如奏鈞天如遊冊府
某再四迴環蓬心雪洗徐行翔佯而歸鼻間栩栩
如也主臣遂無一物充貢而餽釘套儀又非所施
於大人長者家藏兩漢紀一部敬奉清牖書不盡
言言不盡意

奉候侯老師

客歲中秋老師過敝里某捧卮侍坐獲領夫子之
微言一息真足千古已細讀老師近作覺靈均以

來始執此秘老師之謂集大成聲金振玉出聖入
神耳迨送之水西徐行徜徉而歸鼻間栩栩如也
吾師乎吾師乎詞林淨業亦何與人間事而遂至
不免其始而卹然以駭既而穆然以思終而嗒然
以定蓋老師此一歸也千秋之業六月之息三事
之庸咸備焉其猶橐籥乎寧止雅頌得所而已雖
然日入於地雲去於天老師此際定別有一番受
用區區世俗慰藉猶道堯舜於戴晉人之前也其
其有蓬之心也夫其蒙老師知愛最深尋次服官

濫竽司版還願簪裾皆老師所賜某能一飯忘老
師哉目今已乞一解差回家可以事母可以讀書
居身行己雖不敢執鞭古人要一念經經介石求
不至負墮以作師門羞則次盟已素矣久稽晨風
時塵夢寐茲因葉著老錦旋敬候興居不腆聊代
篚厥束脩以上伏惟莞爾長河雙鯉翹首德音臨
稟馳切

荅李年侄

尊先翁仙逝不佞多絮之誼有然所求乎朋友先

施未能既愧地上又愧地下抱歉如何可言大諭
云云躊躇再三而不敢措一語恐非徒無益而又
害之使乎解人已會此旨又聞尊先翁襄大事在
即不佞纓牽控冗未獲與執紼之列悲慨交心主
臣薄莫附布几筵嗟乎平生髣髴尚陳中聖之觴
厚夜渺茫徒挂初心之劍循覽東坡先生祭友人
語不覺淚灑行間臨楮盱眙伏希涵鑒

荅錢公調

蓋聞文章千古得失寸心非其人如聚聲而鼓之

是其人如聚沙而雨之跪石而吟投弓而笑天下
知我而一人也一人知我而天下也不佞究心此
道十五年矣所遇數十公矣不惟彼不可遽與於
知我即我亦不敢遽與於知彼微乎微乎有神存
焉有道存焉有機存焉不謂當吾世而獲公調錢
先生其人者也先生雪竇月湖控勒扶桑之地不
佞生冀頭青尾捲纏薪菜之鄉丘蚓神龍懸逾天
壤謬承玄會不我遐遺徑路絕風遺通超面而謀
心即文以見道謬因蕪穢傾吐菁英鍾期滿志於

高山成連移情於大海千古所獨喻者此耳恭記
寶槭洋洋盈耳再研鴻製疊疊入懷美哉文字自
醉李漢陽以來未之有也秕糠數語着糞佛頭蟲
劑管窺挂一漏萬第離形得髓剗心去皮照之於
天聽之於氣則不佞或於先生有獨契耳

荅范明府

治其生而有文字之癖每當憂愁怨怒見一書冊
即釋然而平然若不能讀又若忙若懶若好酒若
周旋人事以是與書似親而實踈跡濃而轉淡抱

茲微裏堪向誰語今一讀明府緝著真天下第一
讀書人也曠世祥鸞辱在枳棘使人慄慄不已使
非明府先施下問幾失明府矣人固不易知知人
亦不易所欲與明府語者正多恨倉卒未尋端委
稍需之一尊細論尚有無限披豁也小刻數種附
使請教諸容晤盡不宣

答胡嗣玄

第一中庸人耳鼠肝虫臂暖暖姝姝於一切古文
大書槩乎其未有聞獨八股一道如牖中窺日自

謂知之先民型範後進風標間嘗粗涉其流畧遂
不免攘臂垂涎妄冀大物而文力未齊文福益薄
逐隊循行聊告成事乙及房牘聲聞過情心竊耻
之即江南一二奇士過陋巷而奏軒轅鄙儉崛強
尚未服膺至敝鄉萊陽諸子氣臯牢籠幾空海內
爭蕭然柔淡其間夢寐密商曰姑舍是王瞿陶許
其人與骨皆已朽矣九京如可作也吾誰與歸死
者復生生者不愧雖執鞭之士吾亦為之不意地
之相去千有餘里交一臂而即得之天涯比隣如

吾兩人之奇絕也弟自讀仁兄文夙懷頓盡擊木
為節屋瓦動搖披然曰宣城以來道在是矣中心
好之不帶口出情見乎辭非敢為佞昨搢拙數語
止恐着糞佛頭乃辱齒及愧矣迴環大牘明月盈
盈古人去人正復不遠弟沐浴徜徉百十讀而未
能已也祖五色之靈芝香生九竅咽三危之瑞露
美動七情有斐君子文不在茲歎賞彌襟有懷良
覲草草附勒不宣

與張子襄

瑣事屢續欣承教愛弟可謂無厭之求寅丈可謂
不倦之施九頓三復不知所謝捧諭案牘峭嶮藉有
氣力知言哉謹以全集奉覽其間弟備有竄易處
點金成鍊固所不免要之苦心為古人周旋樂道
人之善竊比於我老彭弟生平心事盡在此矣臨
風馳注

與程畸人

恭惟年丈月皎冰清霜寒雲潤吏治文章之兩擅
神明豈弟之咸宜花滿當朝琴流長水鴻猷茂密

駿舉騫騰文部詮垣均虛左席以俟先生譜牒又
可知矣有懷如雨寄託晨風千里一紙敬陳瑋士
瑋士為誰乃弟生平石交貴治馬遠之也曩弟諸
生時讀書馬北海老師衙齋與遠之共研席者三
年忘其剗磨最深習其文行亦最深弟心嚴而兄
事之不敢以雁行進乃弟已騰躍數武遠之猶凝
息六月說遇範馳良可共嘆而遠之又耻以文士
見長洗心繕性如大王天球每每青鞋布襪入千
峯萬壑中夜靜焚香松聲徐引其與里社家園未

數數然也當今之世而講良背行庭之學則遠之
一人而已貴治有如此瑋士而弟匿不以聞懷寶
迷那何所逃罪用是不辟燕鄒齋沐而獻於台臺
友仁事賢羊大與遠之交敦古誼入室披帷當勝
平子三倒中心好之余日望之又有趙退之者風
領毛骨迥絕一世年大李選槐蹊不可失此杞梓
臨楮可任瞻馳

與任文水

第竅啓之民也不能文而好文不能詩而好詩上

不能葆光次不能流畧而篤好博聞有道之人今
霜鬢稜稜矣而所好不衰何者風性然也用是坐
通書於文水先輩執事猶憶數年前識執事於小
試卷中爾時跪坐以進鼓歌以舞念茲在茲名言
茲在茲腔中滿貯一文水矣嗣乙丑之役第謁見
敝座主座主首詢執事已於幼輿處遂得聞執事
之詳弟於是手腸轉骨飛仙仙欲往而山川脩阻
欲從未繇茲因幼輿使便舁通姓名以聯衿帶倘
執事不棄管蒯弟將介幼輿而訂喬札之歡遂其

風性樹肥良多眩措亂休

與程魯齋 四首

弟已打帳揀選矣忽而成進士真是匪夷所思非
賴仁兄和平之庇萬不至此二十年弟兄觀摩之
雅何嘗不思並翼披雲乃弟幸得弛於負擔而仁
兄猶在行間言念及此真覺惘惘雲君之變忽出
意外令人錯愕痛悼不能已今其旅襯已厝於三
皇廟弟與岱雲先生象山兄寔經紀之同社二三
兄弟寔輔翼之遙想仁兄聞此信其錯愕痛悼當

更有甚焉者矣至其南旋之局目前正在商量而主持提携要以仁兄為宗又聞彭嵩螺先生有一牘想亦為雲君身後計昨遠之致弟謂沒者已矣至一棺千里孀弱孤非吾黨之責而誰也弟憐然有慨其言又反覆雲君賦命不猶臨風慨嘆

又

仁兄云紗帽頭巾二項俱帶氣息而山人又不乾淨至欲得不挈腔不作勢不管閑事不弄精魂老飲酒高歌脫然於世故之外嗟乎此活佛真仙也

安能且暮即遇且說罷弟亦付之想像爾矣公
車老人真可人孟大哥近况極佳又於清源置一
如姬冶慧異常弟近日室中婢亦漸和偕惟弟懶
不讀書又好買書老鼠搬生薑為可厭耳趙石樓
弟同籍中奇男子承餉杜亭扁聯精氣挺動一接
翰墨如覲其人仁兄見希道意至祝至祝十八魁
卷與試錄各要一本至十八房同門彙倘便中寄
至私欲於長夏高秋稍為正夫効揀擇之勞但書
多恐不易致須便得乃可耳別有欲與仁兄語者

紙畫遂與正夫面布及共陳書記訂之匆匆不宜
統容嗣奏

又

損仁兄奩中香多矣容當補之所製豆可入神品
香脆不待言而其色之浮動非黑非赤自相光映
極似炮製茱萸弟僭名之曰茱萸豆昨盒捧上尚
未用盡俟盡仍求一盒明德惟馨併叩仁嫂燒塵
二種乃弟自以其意督拙工為之彼墨猶者無異
焉呵呵又茄鮓少許肉鬆少許亦拙工所為也

仁兄一笑弟細嘗江米酒色味韻俱二十分仁兄
新釀嘗以此為第一弟意此種妙品目下不可亂
用必澄之極清一到臘半即煮之明年二三月開
嘗當不減仙露也何如何如界茶一瓶侶不如昨
送粲甫者之精然此間亦不能有俟月上時可滌
一壺仁兄與仁嫂及我正夫共嘗之

又

弟從三月廿五下城矣痛定思痛不堪着想已而
酒醒夢回月殘風曉恍然有省覺說貧說病猶是

世情直扣到未后一着臘月三十方是了手因想
仁兄浮係在京半上不下作何底止此時該自尋
出身之路也五十餘年老兄弟骨肉有加肝腸相
映不比世味友朋不關痛痒不管死活終日徵逐
遊戲以好紗帽相局騙也仁嫂仁姪俱是絕世聰
明試將弟語細細商量且看何如弟語傷苦然而
回味甚甜亦知仁兄忙熱之極故送一椀橄欖湯
耳呵呵凡七奉手教只此一封回書夫此一封回
書或勝他人扶同游衍百千萬億耳小刻呈覽

行狀誌銘墓表統是矣所謂臘月三十者此也扣
至此而貧與病自不能纏繞矣况僅僅衰白止碍
人眼睛者乎是又弟收身後一條出身大路也若
仁兄出身又是一局昨與馬老二談之頗熟渠六
月半即來矣可促膝密證也若垂老之人頻頻生
子真出乖弄醜仁兄不罰弟而乃賞弟何與何時
握晤痛飲極談相思至苦

與沈無謀 六首

嚮讀新詩喫旨酒咀之不窮嚙之愈有益兩月餘

矣而受用佳貺正津津也盟丈清恙想脫然矣弟
近來時苦心痛蓋嗜酒所致然亦有一種鬱盤礙
膺之物撇脫不開者酒居十之半耳此語止畧向
知己道何時握晤一控鬱陶真如饑渴弟有一楫
與扁五欲於堯李開時取一酌中之所二三兄弟
圖一良覲第天時人事未知能湊手否目今出門
跬步惟艱但恐至彼時又成虛願若何若何去冬
敝州忽遭一大警至今病悻想盟丈亦為弟捏着
兩把冷汗今其事與風雨俱徃且看向下消息安

穩便好思至此直是做夢弟近少少翻書亦少少
賣書與此君殆將拱手且畧盤桓可笑亦可愴也
弟思羽吉不減盟丈可出此箋共閱花朝在邇而
凄苦如冬殊可怪或曰是當然耳不怪也

又

去歲臘月廿二日得盟丈書又讀兩絕句禾黍蒲
柳慘於麥秀不忍言好中心藏之而已弟為人間
事所攪已成庸人然昧昧思沈先生一語一言便
如清涼樹下打坐不覺沸熱都捐昨晤程正夫見

盟丈扇上新詩灑灑如也自是君身有仙骨世人
那得知其故敬為盟丈誦之弟有刻詩二紙又時
文一篇衫履盡脫聊發心知百里一笑敬哉北來
未知私覲否席杜諸子時相晤否盟丈近况何若
幸一一見教臨穎紆馳

文

渴企中得心知一字真如元微之得江州司馬書
也讀至踐踏數語塞默良久知盟丈於此自有消
息不必弟再作一語相慰藉要之沈先生與盧先

生亦易地則皆然矣長歌可以當泣弟與盟丈努
力頌古何如報國寺老松一題盟丈當急成章句
以代我輩寤言精茗一瓶甚沃渴吻嘉窰四器妙
甚更與弟大戶相宜即開尊酌取旨酒顧影頹然
如與三哥持杯相向柴桑老子有言偶有名酒無
夕不飲今得此便足弟十夕之用矣二日前見子
晉即詢盟丈近况又知羽吉讀禮已過小祥向來
何不以一字相及怪之怪之見希道及盟丈如枉
顧幸勿拘套數即抵牾可也大約老弟兄相會一

句是一句一杯是一杯且出門不易選友甚難盟
夫幸俯允朕說臨風紆戀

又

盟夫三月廿日書四月十三日始到而小東於書
到前幾日亦發則盟夫之為先施明矣極感極愧
捧讀手教令半載鬱懷一刻頓豁再讀所著唁松
清明花柳詩用以下酒遂盡斗石而悲從中來不
可斷絕則盟夫哀樂過人中心達於手腕所謂一
唱三歎有餘音者矣心服心服又讀茲月十六日

書不啻覲面握手雖然終不如聚首促膝之切
親切也目下寇警少靖心魄頗安少需旬日盟
可借羽吉覓一輕舸順流至德信宿小齋痛飲
談推襟送抱一夜話十年書萬古愁同銷共饗
亦樂乎彼此各老大矣少日周旋機緣亦非小小
真實不虛承命弟即將近日細碎詩篇收貯一笥
俟相見評論不請教三哥誰相如定吾文者外有
小文字一篇呈覽又一冊送羽吉同社兄弟均致
下懷臨風紆企

文

窮陰殺節急景彫年伏枕着床得三哥一字便覺
喜滿大宅兼承佳惠甚愜燥吻肅茲再拜弟大病
垂危百念俱灰惟文字結習難化左足已廢右手
猶存而目力尚可從枕上度書日能數卷第隨過
隨忘與自己分上一毫不相干則何益矣仲來回
得鄒平告文賴如椽不淺極謝極謝伏念盟丈之
於詩深乎其深矣弟心知之而口不能言豐於目
儉於手既竭吾才無因得一滿志語以故年來逆

却韻本反舌無聲特好觀古人之詩及一二知己之詩如正夫其一人也即荷盟丈道及足奴應求之紗盟丈可將存藁自己刪定即宣聖亦不必乞靈何況朋友刪成可付第一閱弟如白家老婢稍有知識藜藿不乏願傳之其人俾海內稱詩者知九河之間有無謀先生為吟壘長城即最愴如弟者亦附名不朽幸甚至哉何可言喻明年二月間幸尋此盟至禱至禱昨從仲來處讀粲甫脩荒刻冊有味乎其言之也見希致意可併出此字以代

一夕之談

又

曩會真成良覲明年春暮倘人事清暇則舊遊正
可續也努力加食敢祝盟丈放懷喫酒弟又自祝
綠邇來弟心境湫隘底滯忽忽不樂酒趣索然所
以思還舊觀仍欲拜劉伯倫李太白為老陸也入
月間弟有事珂里子晋出手札相示循譯不已且
未獲謀面與把手相同轉盼間就是歲妙
頓忘憔悴佳釀妙極與昨歲何異

曾有弟渴喉煙起更覺相宜阻爵明德美動七情
謹百拜以謝臨風馳企晤羽吉幸道相思

與孟幼輿

四首

九月廿一日弟巾車就道悠然而西一路軟淨廿
五日抵滄水上敬仲勉庸驚喜無端以為德水從
天而下也自此笑談周旋者二十多月備極人間
朋友之樂興盡北歸主人及二三同人抱腰苦留
幾廢食寢而弟之車又巾矣是行也主敬仲園上
晨夕相狎吳于達逐日至勉庸偶有事郡城破八

九日及歸則卜夜以補之弟堅坐呼茶觀諸公之
爛醉衝泥問月屢聽鷄啼稍暇輒走郭定之園亭
觀魚賞花追暮始旋劉長公時以素饌饌我瀕行
又得劉先輩岳父學唐公子皆携具餞之東橋鄭
重而別有女郎焉曰李愔字素心具林下風致酷
嗜學問賤玉帛而貴文章十日之內雅集者三將
行話別彈琴一曲送我車已駕復追之定之園
一拜手製少麪食相遺其小如粟其圓如珠其光
潔如玉弟什襲藏之歸與諸兄弟作一湯會耳

此行得詩十首敬仲勉庸于遠各作五言古一篇
於前月廿六日始解笈於古屯古屯者清源之東
屯而吾州之南屯也寥廓清奧起居自得行坐俱
宜遣阿登至家以舒我母懷抱併候仁兄近况一
切長語登能口之故不具

又

併日勞費謝不可言昔人云弛而不張文武不為
仁兄欲斷自今日靜坐潛會此德脩罔覺之候也
造化在手夫復何言弟亦欲收召魂魄稍養微力

以之官倘再得下茹回頭商量此事使弟効觀摩
之誼更與弟一段熱心相符但恐此兄好喧終令
此語委之道路柰何柰何秋色漸高白雲明月十
倍常時吾輩肯却掃半月又不可不一命棹樽所
謂張而不弛文武不能也德水談道的的如此非
幻輿吾誰與微言醉中得一絕句贈四麻疇昔之
夜擾伊鷄湯施者倦矣報者可知乃報以一扇一
詩恐伊不足且疇昔之夜鷄湯頗嫌油多弟又從
而為之打油是益多也一笑一笑文水稿畧規之

其息深深容着筆以復詩扇即頌仁兄便中致之
弟無顏徑送也又一笑

又

仁兄戰勝好音弟傾耳以俟不携書不結伴最覺
輕快妙哉妙哉即此是真消息樂水鵲山與聞斯
語每次頌仁兄置書輒損淨鈔心甚赧然今次容
弟酬直而後敢仰干末事大約史漢諸書俱已有
茲所搜者全在宋人而南渡以後人文尤奇即元
人有極佳者如元遺山之類是也南渡陸放翁刻

行矣此外如葉水心陳簡齋周平園陳止齋謝皋羽諸公如有遺集皆當物色即我朝如楊南峯徐武功定不尋常此外如雜鈔等項亦助聰明而黃山谷古本全集朱子語類皆真實有益之書也其他仁兄自能以意斟酌欲言不盡

又

仁兄置書數種約畧言之匏庵東洲俱是先輩名流即無詩文亦可傳况其詩若文儘有品質雪堂集大有徹亮處看之亦知世法禪錄一帙弟於宗

門不着脚遂不知其深淺蓋有涯有與何大復一
書其出處性情極似弟但弟文質無所底止不堪
與有涯作隸古今人有侷相及而竟不相及者此
是也聖學宗傳完上弟最愛泰伯箕子入我明則
有王心齋先生所謂教外別傳也心老初時舉止
頗劣登壇以後滴滴皆水棒棒見血省得王龍溪
多少間架羅近溪多少枝葉仁兄以為何如佳卷
伏讀良久中邊已化乃見井芳文章至此方能歷
倒時流自開戶牖弟強擬天氣環流四字彷彿近

之緣有岱雲先生點定不敢紛紜仁兄深造自得
乃每見歎然使弟無得而相此壺子之所以示季
咸也深乎深乎弟不知其誰何有徬徨太冲莫勝
之側而已使中過我面談

與程正夫

七首

初五日與魯翁泊頭北二十里相遇喜不可言飲
竟日而別詢社兄近况甚悉種玉滋蘭消息在眼
謹浣沐以俟若某則再生之身既廢之病仗庇還
寒孰如隔世癡兒弱女觸緒牽情此外精氣既通

何嘗一錢不在知己願功令甚嚴起居宜慎倘畧
畧放肆便有開門延客飲酒高會之名聲矣為此
特下忍力不見一人一則不便異同一則保全性
命社兄天下解人定妙達此指白箋一幅呈覽恭
承雪饌食指飛動不休即洗盞開筵放飯大嚼矣
飽德醉心九頓載謝新茶少許附獻亦虛應故事
云爾非佳品也寸心言不盡

又

衰病之人何敢言讀書直是閑不住耳向從出山

視漕一往廢書昨在潞河因局完乞骸始命吏鈔書若無善手藁草而已今茲還山杜門謝客日以閱書為事然癖性不能讀大書涉獵瑣碎所謂不賢者識其小者於唐詩中鈔出五言律一編名曰唐律清謠平生最愛黃山谷之人與文今乃取其集細細編排名曰山谷文鈔第繕寫乏人書成當在來歲則奉社長一覽臨清有一老明經曰汪大年范質老極重之近亦求其所輯書鈔得數本大約零星雜碎與某同病初無關係也其所涉獵者

甚夥既無人鈔又自不能鈔俱付之悠悠亦屬可惜萬首唐人絕句亦鈔得數冊尚有訂正向來惟揚升庵先生最踴博洽著書百種後來有河南木子子田耳前在江南得一徐元歎其人無求於世一味工詩某亦為渠作序尚未寄至過去之鍾伯敬見在之李寶弓凌茗柯俱重其人要其人其詩自可重也聞金壇有一于褒甫家最富而不出仕閉戶著書年已七十矣惜未之見也近來以布衣奔走一世者為陳眉公然而太閤山人中如王百穀

文不足觀而詩實可愛秦漢唐遠矣南宋有一人
曰陸放翁真作家也昨在潞河鈔得渠詩一冊謹
呈覽此不可為吾法而足以備我用徐文長其狡
焉者耳某有微願倘得十年不死當了諸史及詩
書二經目下且遊戲諸雜冊以為杖峯蔓壑一笑
一笑嗟乎生民要務惟應舉作官求田問舍讀書
一事存可也亡可也要性之所近亦不敢辭惟問
及乃道及亦聊代一夕之談

又

子田詩習唐而得其貌文筆亦不高大抵博綜自負元歎詩墜鍾伯敬雲霧今則能自立矣俱如社長所云尖酸二字深中注詩命根渠甚得意其詩題某以為絕不必昔人云奇過則凡况元未曾奇乎天下事勿論作文作人只以老實穩當為至唐詩之妙不可及處皆極妥極真而清微變化天趣溢出所以獨擅千古一至李長吉便覺面目青黃况極醜極歪如盧仝輩者乎某於詩元無才無學然穩妥二字非曰能之願學焉眼前惟有社長同

心合調遂敢吐其狂言在他人前則有喙三尺矣
近來錢牧老為文章老手然其詩頗有誇富之異
蓋為學問所打攪耳蓋代一手尚復爾爾他尚何
言改彙領訖即粘諸壁上常目在之如覲清揚如
聆語話容覓一扇煩社長書新作於上見字畫且
有妙韻非敢倭也昨收拾書篋遇簡齋詩鈔不覺
淚灑行間此老極在行極愛士其學詩實賴此老
提携大恩難忘惟有太息社長近詩憾此老不及
見耳前在臨清會孫二公深乖前翁幾不容

之章彝好其懿德心信

又

先集見貽穆然想見仁孝之性於簡冊之間大司空沒而不亾者慈孫留之也拜讀之餘歎衽增重又承台雅輯我先祖遺詩一字一金足補家乘先祖文魄實式憑之其曾孫叩感不待言矣社兄具良史料所著志畧杲窺見一斑不勝羨服其有功於吾德甚大觀風者采錄定在所先真實不虛某謬有增益忝酌聊効一得杜亭詩譌頗多不止應

沈等作今俱飽蠹魚沒塵埃矣止存柳夫人一首
亦覺寥落意欲社兄作一記以不朽此亭又揆之
誌體亦宜想仁者於此際不可讓也又有說焉杜
亭既編入誌則東樓萬不可少以東樓為司空所
建加以牧老題詩八首則東樓為魯靈光必矣編
入誌中便中求虞山一序料虞山欣然命筆乃不
虛社兄編纂一場候張九如赴揚州任順風一託
計日可得也又記牧老東樓詩後有譚梁生詩二
首魯翁一跋俱可編入以存故實至祝至祝某本

頌既荒口欲言而未能洗眼滿擬墨蠶測止此未免孤負作者然文章之高美未嘗不意會也定當付梓流傳方見大雅其處梓人飽食握劔以俟

又

昨京信至撫軍廿四日回咨到部廿五日即蒙批准從此安枕養病生順死安屢承社兄挂念謹此仰慰仁懷併達魯翁是役也有人堅不肯出結且出異議又有人焉從而佐之惟靖遠相為昨有字至亦謂身到便了今俱付之東流矣可見凡事惟

有一天吾人惟有一誠某真老真白真酒真廢親
友不信而官府信之滿州信之豈非天哉且雪堂
出衙門久矣更有何人為某乎某平生仗忠信此
殆其存鼓耳昨沈無謀亦有字相訊故懷不下此
又非同鄉共井之人也某感而泣下為社兄最相
關切遂蔓延及此止共魯翁知之不足語人若大
疏欲上一再思之則似不可者天下事同歸而殊
途一致而百慮某自當為自身全廉恥為廊廟惜
社兄其何說之詞以年則庸壯也才則為

時所需也粉署香少延歲月太守為城正好展
布豈可未出門而遽毀車馬望解人三思某極不
喜人強人做官又不願人無故罷官平氣虚心揆
之情理定當出此遂敢畢其愚忱希定省魯翁時
以小帖尋味商量至祝至祝

又

讀何振先傳振先不死矣至文之錯綜變化飄忽
渺冥直逼古人居然作者惟社兄自知惟老夫獨
解謹謝教九老行期尚遠俟渠移出公館吾輩可

携具一醉拙詩已送去矣承命某古文詞實勝於詩於古人闕紐亦畧畧窺見但不喜留蔡從四十以後所作雜文不下數百俱付廢紙篋中供煮肉用可笑亦可惜也偶存得一二種寥寥數則不衫不履直寄焉而已然甲申以後遂爾絕筆在心知前不敢匿醜望指示我中州集領到傅景老不飲酒而能款客雅趣翩翩致足樂也偶檢得惠泉兩壘雖屬隔年老水正喜其有先輩風流謹與知味者共

又

夜來見舍姪說社長理舊齋讀書甚為之喜而起
舞又社長不止讀書而兼能著書甚謹取孟浩然
詩句奉贈曰翰墨緣情製高深以意裁社長以為
何如承手教實獲我心某久為詩酒所污學道本
懷遂至墮落然而不能忘也昨元旦夙興觀大雪
忽發深省鞭心礪志誓不下流憾力量既衰時序
又暮恐不能究竟此事而意根結注終欲蓄茲一
段靈光以脩再來薪火不敢不勉神之聽之若社

身外集卷之三
長年力正精極好下手從今做去至某之齒則大
丹成矣爾時某改頭換面恰是新學在座下聽法
定當言下有省肅茲職志適晤百史詢風雅於吾
州某首以社長應有老又雅重社長之品謂急流
勇退卓不可及肅復併聞

答許繩齋先生

某夙於李思伯老廉處論先生道範繹先生法語
則欣然願為之執鞭特以齒卑身賤未敢徑通尺
一乃謬辱先生且風遠遞開闔數四瞻之在前某

凡事如僧剃髮無有寸長獨貪慕名賢一念不敢
後人松江徐思曠者千古軼材也某讀其書想見
其人且聞其人有道氣又久困鹽車故於鄭青浦
赴任諄復託焉期以國士之遇鄭君多聞好善天
下有心人想於徐君特下陳榻遂致徐君通賤姓
名於函丈此段因緣人也亦天也某不敏其敢忘
先生之高誼及思曠之德音至先生措尾所以效
良箴於鄭君者更見君子之愛矣某敢代為書紳
主臣小刻二冊順風請正又素卷一軸敬求先生

手書數語奉為司南臨啓可任懇企之至

與鄭淡石

相別整一年矣原期鯉魚風起可奉德音今燕山
雪花如席如笠而南鴻尚在雲間可任肝馳弟隨
分得一版曹都無所事惟欲乞一解差回家讀書
耳以年兄之才品學識雲潤冰寒神明豈弟於青
浦乎何有弟亦不敢雷同稱譽着冀佛頭第於年
兄一片好善之懷獨自有感也徐思曠者弟未識
其面而篤喜其文心肅肅如對古人遂以國士之

過託諸執事昨敝鄉許繩翁有一字謝弟其間致
意年兄者甚至非年兄感思曠之深何以此段因
緣得達之繩翁而併以波及弟也譬諸草木其臭
如蘭矣年兄鳴琴之餘著述復有幾種乞寄我以
慰饑渴至望至望思曠全集亦思一讀禿穎飛動
不盡惓惓

與韓廣文

不肖竊起寡聞之民也半生弄柔翰而未聞道上
之不能合符古人次之不能抗旌令人單棲孤往

同塵閉關每若抱微言而無告親友周旋第以酒
盃軟語溫之而已嗟乎誰則商及此事者哉乃當
吾世而有韓先生未嘗謀面輒爾推襟豈非曠世
之奇人希有之盛舉乎盥讀佳卷絳霄青芝似非
人世間物已未而義竟可壓場而佚於殼外是造
物者欲老英雄之才而厚報之也天降時雨山川
出雲來春杏信匪遙先生彈冠以蒞不肖謬辱同
薰可任舞蹈清祀謹登四事附以土物二種願學
縞紵之微即訂札僑之雅表兄弟輩欣沾化雨三

復書紳併此申謝

荅畢同年

弟非能忘情於功名者也特將母情深遂龜勉歸
養蓋幾畜度量屏營徬徨而後能決甚哉世味之
牽人至此歸來仍作書生密娛自悅階下之苔日
厚矣忽接台訊如對芝衡沐浴迴環不能已已廢
承大貺彌重逡巡佳幣跪獻我母母極感年丈厚
誼命兒子北嚮百拜以謝弟又縱觀園樓歌詠不
帝集群玉而府之恍身遊其中作濠濮間想惟弟

俚言續貂不倫為可愧耳以年丈雄文綵筆如謝
監山居自賦自注正足豪舉使弟鄙倍着穢佛頭
此集不光矣真切真切陸君可既與年丈遊載披
其詩翰真是可人恨來稍遲值弟闕已閉無可柰
何弟立戒甚嚴君可見而知之不可一人一事稍
涉異同使在月前則傾倒極矣一片未足羞遠客
聊効昔人縞紵之義耳弟之歸養也全仗堂上老
先生代題又過蒙獎藉不第感恩又兼知己萬祈
年丈家書中道弟下悃從來堂屬未有古心厚道

成人之美如尊兄老先生而弟何幸身逢其會也
中心藏之貞於沒齒附此端控伏冀留神

與侄裕

陸夫來知吾侄清吉阿叔選得一名戶部主事閒
清冷局正好讀書惟京中日子不易過手中銀子
不見使一切起居俱從苟簡天生性淡懦不能追
嗜逐好過一年半載有好差出決不能共人講槍
惟匡坐讀書而已做書生時日夜望做官及官矣
仍是一書生耳可笑也侄勇猛精進極喜極喜但

備為有序不可太銳以蹈迫蹙之轍讀書之暇風
前月下一觴一詠未為不可我墨卷有昧理而失
之平房稿刻十八首中有七八首大通令人耳目
頓易我欲摘出另刻一薄帙使吾鄉知我為不魯
廢業人又恐驚壞大眾柰何然此房故多勸敵如
翁如鄭如宋如江西之陳之龔皆卓乎自開宇宙
者也書肆中近出一項進士稿明悟透髓高古絕
倫吾侄試觀之文心當有勃然者矣其餘平平耳
方又宗既已丁憂考期想尚遲然不可因此稍懈

磨厲正在此時此道純是精神用事精神能透出
他人自然擊節矣我歸當在六月杪爾時與吾侄
細論之

又

前偶輯舊說制義約二千首又一汰之得六百餘
首從而名之曰文心又心者言為文之用心也余
生平不能持論又不喜與人爭競故大廷廣衆談
文之時甚少所秘密愛用者惟此心耳簡端兩序
畧見胸懷人莫知余之隨人而不知余之自用乃

如此一笑一笑每見侄喜看余批選津津不能舍
天骨向之間得此知已樂矣老泉集舊有二本乃
照三蘇文選中鈔出者偶見趙夢白老泉集選一
冊大有好處侄可細細閱之又唐荆川文編余昔
日在古屯養病曾此兼六本併可一覽爾時猶能
讀書今則老矣倦矣無本末無終始竟日頽然可
嘆也漳黃河崖人來報晚苑消息三四日間即爛
壞或十五十六希定一期吾兩人襦被竟去以踐
雪約以死原代竹林也

與陳雪灘

用潛兄行魯附一牘想達又矣伏思弟叨翁兄知
最深悠悠莫莫未知報德何時通夢交魂推衿送
抱惟託之寤寐而已入秋以來閉閣自繭少陵所
謂自斷此生休問天第實有之而附郭寥落無柱
曲桑麻憂道憂貧何適而可所恃翁兄知己天下
一人耳翁兄岩居三載眼淨心寧而後出任天下
之重麩蕞塩梅舟楫霖雨第窮老東岡有餘適矣
茲因劉仲寬赴任敬謁翁兄遠寄此字第居平不

能津仲寬惟作關汝州楊成都二紙秀才人情舊
規如是晉仲近况何如自齊尾望西川不止八千
里路矣弟顏尚朱而髮已宣晉仲想亦微微有鬚
耶一笑公穉亦有文字往還否弟一貧徹骨又無
子息未老而衰霜髯蓬鬢獨喜近來文心頗恣詩
律漸細夜即自大不敢多讓古人心不同有如
其面苦茸冷暖獨笑獨歌行路悠悠固不足論即
二三兄弟猶未免以酒人粗我以快士賞我我與
我周疑久寧作我吾斯能信匹夫之志不可奪矣

至若身世遭際口不能言有數存焉每誦孝標自
比敬通語輒鼻酸渾下君平棄世世棄君平人既
嫌我真我又嫌人不真過此以往惟請杜五郎作
先生耳隱居放言不罪不罪

與童將軍

生性畏暑加以親戚囉咤日日在酒食地獄中汗
以斗量乃人世未有之苦也故又欲扳大將軍一
醉嫌肺腸不清尚爾次且俟中秋左右白露明河
爽撲衿袖當卜晝卜夜一傾年來積渴也

與平湖令程畸人

弟諸生時讀書馬北翁衙齋與貴治馬遠之共研
席者三年受其劄磨最深習其文行亦最深弟心
嚴而兄事之不敢以鴈行進乃弟已騰躍數武遠
之猶凝息六月尋想天人良可笑嘆而遠之又恥
以文見長洗心繕性如大玉天球每每青鞋布襪
入山峯萬壑中夜靜焚香松聲徐引其於里社家
園未數數然也當今之世而講艮背行庭之學則
遠之一人而已貴治有如此瑋亡而弟匿不以聞

亦何所逃罪用是不避蕪鄙齋沐而獻於台臺也

與葉橫水令

乙丑之役獲陪老年臺看花長安根馬蹄紛踏良
晤終懸每一思存可勝取企况附維桑之末尚厯
折芟之歡幸鳧飛河潤近在戕柯渺渺企子仙軀
欲往久擬奏劄一控相思偶貴治有隱君子曰崔
彌高還里之便敬附八行崔君與弟遊最久弟知
之最悉其人足稱天下長者而囊底智甚饒博物
洽聞如探淵海復長於兵而火攻尤妙亦曾經大

人先生物色欲授以偏裨崔君泊如也布袍草履
徒步南岡目今年望八矣而神觀逾起弟每以趙
營平之業期之崔君笑而不答且力難起人沉疴
非藥非物人老手幾摩霍然良已當吾世而有此
奇人遂如枯枝稿蚓惜矣惜矣今茲上謁百無所
煩但得邦君稍賜顏色便勝十朋九鼎矣

答賀勞山

苦雨愁霖生趣幾盡忽捧社翁一字恍如鐘鼓報
新晴也快甚快甚弟自號老鐵乃言其不成器也

沒有鋒稜一段頑鈍可笑之物耳如社翁所說則老鐵貴矣老鐵敢乎哉佳貺件件精絕有雨具又有酒具遠道相將更為彌重謹謝

與侄裕

尚書說統尋出笑只此一部便一了百當但中有竅會必面指方明昨夜靜味侄談論俱根極理要一變至道從此事業無涯歸來喜而不寐雨中無事又尋出許多應酬書稿文莫吾猶人也躬行未得惟有憶歎然內亦有數幅可鈔而誦讀者在我

侄擇之明晨希挾朝氣而至玩初日芙蓉即午可
以收局不欲區區餽飭令賢者執熱也

又

場中消息務要綿密肥潤次第井井至見成語切
不可混用至祝至祝時迫矣亦不必翻書冥目靜
坐或散步微吟以養全力開喜神可也

又

首作有微言妙論入手便得法度是矣是矣大約
此題俱是極力唱采語微管仲句脉從民到於今

受其賜來豈若句則借容形主闡出英雄作用棚
儻圓明之故矣二句原是一氣於過文處再加點
醬反隔次作本章開口便提一個堯舜之道作話
棚乃是劈要字的大斧末復云以堯舜之道要湯
從遊戲中出大正經就案翻案竝如鐵山認之認
之

尊水園集畧補遺目錄

程先貞正夫

德州盧世淮德水著 受教李源星來輯

趙其星仲啓

詩

陪黃東厓談藝

贈萬吉人 二首

贈周彞仲

贈朱蔚園

卷之四十一 補遺

程正夫千里傳書

云云

晤凌茗柯舟中

云云 二首

趙季含過訪

有序二首

酬言

共十八首

尊水園集畧

詩補遺

陪黃東崖談藝

東崖謂從王覺四先輩論詩數揚挖有餘不盡之妙

從君聽款語詩竟未曾心何待人矜重要須自付
量高心鄰客氣孤秀藉群芳不盡淵然意披襟再
四商

贈萬吉人

君是乾坤倚仗身一番挫折愈精神抗言異代憐
同調求友今時得古人緩步高峯詩價定比肩管

樂品流真尋常鷄黍深相款對榻蕭然意更親

次韻再贈

鍾鼎山林各有身文章交道互藏神秉心不敢輕
流輩畜眼今纔見若人把酒偶將賢聖較稱詩還
取性情真一泓淡水相成處膠漆原來却未親

贈周彛仲仍次前韻

相逢誰是自繇身落落如君有遠神擺却塵凡存
雅意保全善類賴仁人弟兄友愛園林好師友交
情患難真一劍家藏今脫贈生平喜與道緣親

贈朱蔚園仍次前韻

朗月冰壺瀟灑身
洪流浩浩蕩風神
詩文社裏推尊宿
簪笏場中出解人
態度低回嫌我老
胸懷直舉羨君真
傾杯夜半談彌雋
新得相知分外親

程正夫千里傳書念及老
病軀我七字長句
藹如也
慶念老饕
遜分佳菓
阻嚼德馨
臨風再拜倚歌而和仍付來使

木下天高冷色新
接君一字藹如春
詩腸別具饒仙韻
書目遙緘脫宦塵

正夫貽成均書目俟我檢鈔

精謹風流

瞻具美文章政事識分身食甘知味思彌苦伏枕
裁書託鴈臣

昭凌茗柯舟中晨光初動暑氣自清恍濯魄
於冰壺也

艇子冷冷傍晚河對君只似對維摩胸中閑氣消
除盡把酒臨流一嘯歌

時茗柯自都兵垣出叅知福建

掉鞅詞壇列衆雄誰知清遠是宗風如憑俎豆通
今古作佛成仙七字中

茗柯論文貴在清遠又有媚余杜亭詩云如憑俎豆

通今古豈止詩又脩典刑

趙季含過訪 有序

季含名世英關中人關中肯多博雅今惟文
太青先生巋然如魯靈光季含求友四方勤
學好問於文先生尤數數云季含本業之外
尤殫精於詩兼工古文辭丁丑試禮部出場
伯祥太史門既收復滌太史惋惜良深季含
感佩知己文筒請益無虛月會借璫景庠景
去德可六十里季含聞聲相思携輕騎過我
草堂時方盛暑尊酒論文灑灑如也信宿而

別無一點塵俗氣小詩相贈情見乎辭

一見溫然君子儒微言掌上出明珠縱談太華登
臨勝天外三峯湧座隅

頌得新詩字字佳天然全不費安排行間忽得驚人語
海立山奔豈受埋

酬言

王鳴埜自江南來啓其行橐光怪豔發迫而視之則清漳江夏防風海虞雲陽金沙諸君子贈余之詩及所著之書咸在焉盧子且讀

且拜不覺心醉已復自念山東酒徒何與人
事而諸君子鄭重若此惟有感與愧而已欲
倚歌而和若才思荒畧不能成章漫為口號
薄控心區命曰酬言非報也祇以申暢來貺
云爾

劉無疆

不仙不將非男兒

無疆詩句

解帶披襟誦爾詩
智伯頭

顛為飲器更烹白石膾靈芝

捲却唐音謝楚辭
天真爛漫是吾師
喜君不作差

排語朗月當空一問之

郭無傷

齋心恭閱黃離集發興高吟寶劍篇未墜家聲惟

爾力慈孫孝子世稱賢

黃離集係尊甫文公所著

恭喜詞壇得老鎚相看不厭從軍詩

無傷近有從軍七言律詩

十看濟南卓亮弇州細江夏於今又出奇

茅止生

九仙骨自茅家有經濟場中老斲輪涕淚受官為
大帥生來不幸作文人

君憶山陰陸放翁眼穿夢斷九州同可憐數斛英
雄血潑何雕蟲汗簡中

止生著作甚富近又有石民近稿石堂彙刻

何士龍

士龍一弱秀才追隨虞山先生不避風雨

超然入表有阿龍患難從師得所宗萬仞虞山天
下仰今番許爾一登峯

李孟芳

爛醉何人念老狂悲歌斫地有王郎杜陵青眼頻
頻望擬把襟期託孟芳

多君高義古人同敢不欽承立下風傳得相思惟

鴈字殷勤兩地送飛鴻

毛子晉

翰林作主墨為卿萬卷繇來勝百城欲覓雅人深
致處山齋匡坐一燈明

丁卯橋邊詩韻高三羅昭諫氣尤豪遺編如土誰
收拾絲繡平原有大毛

子晉近將丁卯
甲乙兩集授梓

賀函叔

忽從世外得佳人玉骨煙姿淑且真不必揚蛾驚
女伴隨宜梳洗自清新

昔者曾遊地肺山
茫茫空手隻身還
因君舉似生
回昧何日相携洞壑間

賀無黨

諸城舊日神明宰
請劍先年武部郎
寄得篁川詩
一看行間墨裏靜生香

于昭彥

君家冰雪淨聰明
聞警詩中富甲兵

昭彥近有聞警七言律詩

六首神駿千金憑剪拂
雄風散入四蹄輕

絕妙文章出月儀

昭彥有月儀閣文葉

青霞天半想鬚眉
看仲

連太白時相見家學淵源自得師

尊甫如翁先生

周仲馭

誰搜碧血開青史烈士哀歌不等閑
讀罷凜然風雨至周侯識力定於山

真詩縹緲自天來想得山中匠意裁
寶色扇頭時挺動從今一日百回開

尊水園集畧補遺目錄

程先貞正夫

德州盧世淮德水著

受教李源星來輯

趙其星仲榮

祭文

祭紀化成

祭張孺人

祭金顯真

尊水園集

祭文補遺

祭紀化成

年月日第世澹謹以剛鬣柔毛清酌庶品之儀致祭於化成紀表兄之靈曰嗚呼道喪千載人惜其情有酒不飲但願浮名苦心抑志踟為尊生百年鼎鼎如流電驚所以達士觀物獨精解粘釋縛掉臂遊行達士為誰紀凡化成萬夫之望千人之英當其弱冠頭角崢嶸掉鞅文苑先諸子鳴推鋒飲

羽領袖膠鬲數竒不偶長鋏短檠日月逝矣袍繫
柴荆青衿歷落南面百城莫我知夫且進此觥一
醉一石五斗解醒兄事杜康弟育劉伶嬉笑怒罵
桓溫老兵友道最重烏鳴嚶嚶慷慨一諾千金為
輕俠腸傲骨磊塊難平雖復忤人寔無所爭九天
霧淨萬壑冰清葺以薜荔雜以蓀蘅古之狂肆誰
能與京今也則已空睇銘旌裴徊玄度慟毀公榮
椒漿挂醕舒杓力錯神之格思肅此待傾尚饗

祭張孺人

年月日弟世灌謹以剛鬣柔毛清酌庶品之儀致
祭於敕封太孺人張母王太君之靈曰余與中翰
君之定交也垂二十年登堂拜母灼知太孺人之
為古賢大孺人歌黃鵠最蚤一身而送往事居家
課子幾廢食眠精心密畫自蘋蘩以暨栢棗酒漿
纂組錡釜豆籩蓋天骨卓立辛苦貞堅能明大義
能斷大事能享大全中翰令器不負三遷副以介
弟金玉相宣協心養志朝夕奉太孺人以相周旋
道形而上人盡而天五福既脩彤管煒焉綸音寵

賁翟第標鮮猗歟女中之夫子而至坤之大乾會
弘昌大有終無牽試取古淑女以繫度誰曰不然
小子非敢為佞惟沉吟栢舟之篇爰繫東帛弔教
數衽以陳詞乞小駐夫雲駟尚饗

祭金顯真

年月日友弟世灌謹以香酒致祭於文學顯真先
生金二夫之靈曰嗚呼哀哉昔者吾友越世高華
自開戶牖俯視等夷德齊地醜發為文章獨闢關
經峯峯出雲絲絲入扣一字九賓嗟同敝帚青老

其矜數竒不偶與朋友交有孚盈缶焦腑如冰落
籬盡剖矜麟鳳遊哇牛馬走平生養勇喜北宮黜
無弱赤嬰無侮黃耇無嚴諸侯逆吮必嘔道廣幅
寬不畦不畝皂帽紅裙健兒迂叟當其會心盡皆
把手隆思古人桑陰杵臼聲氣之餘謬及於某某
不能俠差工於酒持洞庭春澆談天口夏淺詢蓮
春深問柳新炊聞梁夜雨剪韭醉被共眠交足及
肘宵亦供脹卯復至酉日月逝矣此情不朽魂兮
歸來共傾大斗沼沚澗溪拒壑二白尚饗

跋

先侍御一生精力盡於讀書而操觚自運者甚少
間有著作又不喜別存底稿方見背諸孤時孝餘
始十餘歲文章之事一無所知而迷離摧毀中致
使當年手蹟散落幾盡諸孤之罪擢髮不可悉矣
幸賴表兄程正夫與陳幼仲趙仲啓李星來四先
生為之收貯犁為十二冊題曰尊水園集畧尊水
園者先侍御讀書之所集畧者緣此集計可得十
分之四五猶欲待大全於異日也先侍御文魄實

式憑之諸孤踴躍感激所不必言

孝餘

捧承涕泣

謹藉皮為楮削骨代頰舉付剗以傳不朽嗟乎
先侍御精神颯颯然隱現集中矣即文以見道論
世而知人是在後之君子加之意爾

孝餘

何敢贊

一辭也因三沐三薰記歲月於紙尾順治庚子不

肖男孝餘謹跋